

醫學指歸卷上

人子事親不知醫古人輒謂爲不孝蓋衛親生急於
娛親志也惟精於醫而七情內鬱六氣外淫爲高年
防所當防始克盡所當盡非孝僅藉乎醫而非醫豈
全乎孝耶獨是醫微矣蹟矣經藏之難辨感受之各
殊按治之易惑毫忽千里焉得盧扁而指授之然盧
扁雖往後起諸儒要皆奉內經及各家論說爲入門
途徑途徑不悞趨向自端上智可進於神明中材不
虞其隕越 雙湖先生所以有醫學指歸之作也指
指示也歸依歸也 先生性純老弱冠卽慮不知醫
不能爲人子而殷勤博採曲證旁通寢饋於諸書者

二十餘年而始有所心得因本其所獨得者作經絡辨證等十有二解指後學以依歸不獨已之心盡於親且使凡爲子者之心皆有以盡於其親焉懿哉誠所謂永錫爾類者哉棠前承乏清河名醫孝子之聲時已洋溢遠邇嗣讀伯韓朱侍御趙孝子傳益知先生之祇奉高堂頤性娛情果獲冲融壽考天蓋成先生以孝天因神

先生以醫也是編卒業有年遍質吳越諸名宿始自訂爲成書洎

先生歸道山 大吏上其孝行於 朝請祀孝弟忠

義祠亦卽取鑒於是異數也實

先生之篤行有以廣茲令譽也今

賢嗣

小湖昆

仲世其家學刊行是書

先生之錫類先錫於家庭其亦凜凜於不知醫不能
爲人子之遺訓也夫

署江南漕督江甯布政使司布政使愚弟吳棠頓首

拜誤

漢人詁經徵實其事難宋人詁經談理其事易醫學亦然自明代薛立齋趙養葵輩倡爲通同之議輒欲以數方治萬病學者憚讀書樂從其說以自便而誤人者多矣此亦高談性命以召生徒之流亞也高郵趙雙湖先生輯靈樞經絡篇卽五臟六腑十二經合本經所載病證表裏虛實寒熱而縷析其用藥之式爲醫學指歸一書無一無本之言可謂能徵實矣易曰神而明之存乎其人 先生之學必有神明於是書之外者然規矩繩墨在是是必不師心自用者也 先生篤孝大吏請

旌於

朝語云爲人子者不可不知醫此書之著蓋卽其孝之一端也譬之經學不特言徵諸實亦且行徵諸實此書不良可貴哉與張子和儒門事親錄無名氏壽親養老新書並傳可也余夙耳先生名且聞其詰嗣三人業儒業醫皆克家無愧今先生已歸道山余與子詢郎中同官水部余弟又與笛生主政聯姻其知先生也尤稔長公小湖家居養母力辭薦辟將梓厥考遺書請敘於余爲述顛末以告讀是書者

工部侍郎姻愚姪宋晉頓首拜敘

序

余自服官以來三令興化每接士大夫必詢其人之
孝友者及仁厚端謹者期以爲風俗倡又以其地數
有水患人多病溼思得良醫起其病衆咸以 雙湖
趙君對已而因微疾見其人恂恂然恭且謹及其論
脈絡分寸如洞見五藏癥結冠一時岐黃家乃知君
故高郵人家於興爲醫以活人爲志江淮間足跡殆
徧性謙慎好施予樂於爲善內行尤淳篤事二親克
孝遇病且貧者就醫必贈以藥雖大寒暑治病弗輟
兼以其暇成醫學指歸一書俾後之學醫者識經絡

原委焉夫以所見於君者如彼所聞於人者如此其
孝而好善也信矣其仁厚端謹而工醫也信矣余因
望興人而并及於僑興之人君乃其尤粹者故於君
歸道山時余有實心爲善之額貺之近聞令子以君
行實請

旌於

朝余亦以令興久編輯興志將成書載君於流寓傳
然則君志在活人君之書又志在貽後學以活人讀
其書者亦可悟折肱之微意也夫因是書就刊悉君
之生平而樂爲之序

欽加知州銜知興化縣事靈石梁園棣拜撰

昔范文正公文章德業爲有宋一代完人少時嘗曰
吾不能爲良相必爲良醫蓋良相治國良醫治病事
異而心與理則同也顧不察夫經絡脈息不足以言
醫卽察夫經絡脈息而不審證之寒熱虛實辨藥之
君臣佐使亦斷不能醫醫豈易言哉 雙湖先生隸
高郵居興化篤行君子也少攻舉業誦輒不忘事親
孝逮養大母大母病隨侍湯藥苦無善治者遂專心
習醫精研脈理自靈樞素問以及景岳諸家審證立
方製藥之法確有心得吾鄉龔意舫太守嚮宰興化
曾爲余言 先生品粹醫精竊心慕之而未一面也

已亥館泰署始識荆越辛丑余來承乏興邑文正書院交益密每病治無不愈甲辰返里病篤諸醫斂手偶檢先生舊方一服卽痊後詢其故先生謂病有本有標此適合隔一隔二治法也其精審詳密類如此先生天性肫摯善承先志拯困恤嫠樂善不倦歿後郵興兩邑纂列乘志籲大吏請旌孝行而諸詰嗣能讀遺書蜚聲藝苑長君小湖前徽克紹四方就診無異昔時今春余病累旬屢醫弗效長君適自外歸數帖霍然淵源洵有自也頃以先生手輯醫學指歸屬序讀之鉤元提要縷析條分益信品粹醫

精龔公諒非虛語嘗至孟城泛珠湖登文游臺穆然
想見前哲之流風而興邑有得勝湖又昔賢文正公
蒞治之邦也 先生自號雙湖其有慕文正公良相
良醫之說擇其一以濟人乎東坡先生謂范公仁義
禮樂孝弟忠信爲有德者必有言 先生出是編以
證世墨藩沾旣臻斯民於仁壽則良醫直與良相同
功矣是爲序時

咸豐元年辛亥閏八月下澣韻溪愚弟蔡春泉頓首
拜

序

語云爲人子者不可不知醫吾友 趙君雙湖純平
孝者也幼因侍 祖母疾棄舉業習醫盡通其術著
手輒效活人無算聲名藉藉江淮間生平好陰行善
多仁人長者之行鰥寡孤獨之賴以舉火者日數十
家寓乎醫以施濟焉孰非孝行所推哉今以孝

旌於

朝 令嗣小湖復梓是書問世 君之醫與孝傳小
湖之醫之孝亦俱傳吾欽其人樂爲敘梗概云
咸豐元年九月上澣世愚弟鄭鑾拜敘

生人者天也然寒暑不正雨暘不時則病人者亦天
天病人而不能治人病惟醫體天好生之心以補其
缺憾人之一身殆初生於天後生於醫乎醫代天工
天報醫必厚乃扁鵲以伎見殃倉公坐法當刑其故
何也竊謂醫必伎與心兼良乃可稱良醫而受福報
伎劣人憎心慝天譴醫之心非必好利而草菅人命
始爲不良也驕吝未除則濟人弗廣而已足自殺其
軀越人誚中庶子以管窺天淳於不爲人治病病家
多怨察其心似未免驕吝宜乎伎高賈禍太史公引
老子慨美好者不祥之器豈其然哉 雙湖趙先生

蓋伎與心兼良者籍高郵僑寓吾興深於素問靈樞
諸書以醫鳴三十年名動江淮間懼世醫之不辨虛
實表裏寒熱溫涼也著醫學指歸二卷 先生卒後

令子小湖將授梓乞

祚

誤敘

祚

自慚謏陋未讀內經

何敢敘

先生之書惟觀今之名醫趾高氣盛不耐

煩勞又或秘惜禁方弗肯示人而

先生謙退不伐

視疾兢兢然恐有錯誤日治百餘人自朝至夜分始
罷寢食或廢未嘗憚煩且天性篤孝當事請

旌於

朝貧而好施邑中窮嫠恃以衣食者甚衆窶人就療

輒贈藥物茲復述其所得輯爲一書欲登斯人仁壽
之域不驕不吝非良於伎而尤良於心者耶藝精而
人不忌身殉而子克家天之所以報先生者顯其
名昌其後視扁鵲輩奚啻過之昔樂天謂夢得詩在
在處處有靈物陰護前謂是編亦然必傳於世無疑
也故樂爲之敘

咸豐元年歲在辛亥閏八月上澣學山李福祚頓首
誤

吾友 雙湖先生所遺醫學指歸一書其子小湖暨

諸昆季付之梓而公諸世囑

宜敘

宜

不知醫何敘爲

然 先生所以業醫之故惟

宜

知之且悉初至興也

年十有七卽與交見所閱醫書過目卽稔

宜

嘗勸讀

儒書

先生曰儒書明理盡性以盡人之性醫書亦

然曩者先祖妣及先妣病延醫診治久藥不瘳竊嘆

已不知醫致使大人彌留床蓐又嘗見有父母者往

往因小疾而誤於方劑卒至殞身失養恨不知酌良

劑以活之俾其親得終餘年醫之習也緣是故耳

宜

因知 先生之醫爲事親計也且爲凡事親者計也